

Ho Bopa Katamelo e Hapang



SABATHA THAPAMA

Bakeng sa Boithuto ba Beke Ena Bala:

Johanne 4:27–30, 39–42; Matt. 15:21–28; 2 Bathess. 1:1–4; Baroma 15:7; Baef. 4:32; 1 Pet. 3:15.

Teman'a Khopolo:

“Le mpe le tšabe Morena Jesu lipelong tsa lona, ‘me le itokisetse ka mehla ho ikarabela, ka mosa le ka hlompho, ho ea le botsang tšepo e ho lona” (1 Petrose 3:15).

Ha re tsoela pele ho ithuta bophelo ba Jesu, ke moo re tla eketsa ho babatsa bokhoni ba ho amohela le ho tiisa batho. Leha a ne a khalemela ka thata baetapele ba borapeli ba mehlang ea Hae, o ne a amohela ba loantšanang le sebe, ba hlasetsoeng ke molato, le ba lahlehetsong ke tšepo le ba tsuoeng, ka thabo. Mohau oa Hae e ne e oa bona. Mohau oa Hae o ne o fihlela le moetsalibe ea mobe ka hofetisisa. Botebo ba tšoarelo ea Hae bo ne bo feta ba libe tsa bona ka tsela e se nang pheletso. Lerato la Hae le ne le se na meeli. Haho le a mohla Jesu a neng a bontša le thlasenyana feela ea boikhothomoso kapa boiphahamiso. O ne a bona motho e mong le e mong e le ea entsoeng ka setšoaantšo sa Molimo, feela a oele sebeng, ‘me e le eo a tllileng ho mo pholosa. Ho ne ho se ea ke keng a fihleloa ke lerato la Hae. Ho ne ho se ea oeleng tlase hoo a ke keng a fihleloa ke mohau oa Hae. O ne a hlompha motho e mong le e mong eo a teanang le eena ‘me a ba atamela ka seriti se ba lokelang. O ne a susumetsa batho bakeng sa ‘muso hobane a ne a lumela ho batho. Maphelo a bona a ne a fetoha boteng ba Hae hobane o ne a ba tsotella ka tsela e tebileng haholo. Ba ne ba phahamela boemong bo a neng a lumela hore ba ka fihla ho bona. Thutong ea beke ena re tla lekola ka botebo haholo katamelo ea Jesu ho batho ‘me re fumane hore na re ka sebelisa litšiea tsena joang maphelong a rona.

**Ithute thuto ea beke ena ho lokisetša Sabatha sa la 29 Phato.*

Ho Bulehela Evangeli

Bala Johanne 4:27–30, 39–42. Kopano ea Jesu le mosali oa Samaria e bontša joang ‘nete ea hore mefuta eohle ea batho e bulehile bakeng sa evangeli. Le libakeng tse sa lebellehlang?

Sebaka sa ho qetela seo ho sona barutuo ba ne ba lebelletse ho fumana lipelo tse bulehetseng ho amohela evangeli e ne e le Samaria. Ba-Samaria ba ne ba lutse ba loantšana le ba-Juda ka litaba tsa thuto le borapeli. Bora bona e ne e le ba mashome-shome a lilemo. Ba-Samaria ba ne ba lakalitse ho kenya letsho khahong ea tempele e Jerusalema empa ba ne ba hanetsoe ka lebaka la honyallana ha bona le meetlo ea bahetene ba ba potileng le mekhoha ea bona ea ho sheba litaba e neng e sa amohelhe. Ka lebaka leo, ba-Samaria ba aha tempele ea bona holim’a thaba ea Gerisime. Barutuo ba ne ba ka feta Samaria habonolo feela ka hore ke naha e otileng bakeng sa khaso ea evangeli. Jesu o ile a bona seo barutuo ba sa se boneng: lipelo tse bulehileng ho amohela. Tlaleho ea Johanne ea pale ea mosali selibeng e qala ka mantsoe ana: “A tloha Judea, ‘me a boela a ea Galelea. E ne e ka khona a haole ka Samaria” (Johanne 4:3, 4). Jesu O ne a “hloka” ho haola ka Samaria hobane Moea o Halalelang o ne o mo kholisitse hore ho tla ba le lipelo tse bulehileng sebakeng sena se sa lebellehlang. Ha mahlo a rona a tlosetsoe ke Moea o Halalelang ka tlotso ea leholimo, re bona menyetla moo ba bang ba bonang mathata feela. Re bona kotulo e nonneng ea meea bakeng sa ‘muso oa Molimo moo ba bang ba bonang masimo a lekhoara.

Bala Liketso 8:4, 5, 14. Ho qetelletse litholoana tsa bosebeletsi ba Jesu Samaria e le li fe?

Barutuo ba ka be ba fetile Samaria feela ba sa fana ka monyetla oa hore ba-Samaria ba utloe ‘nete ea Lentsoe la Molimo. Jesu o ne a bona hore ha ba bone. O ile a bona hore Moea o Halalelang o butse pelo ea mosali. Tšokoloho ea hae ea sekhahla e ile ea ama mashome-shome a batho motseng oo. Ha se ka mehla re tlang ho bona litholoana tsa mesebetsi ea rona ea bopaki hang-hang, empa ha re ntse re jala pelo lipelong tse bulehileng ho amohela, ka letsatsi le leng li tla tisa kotulo bakeng sa tlotliso ea Molimo.

Ha re tsebisise hantle na mantsoe le liketso tsa rona a ama ba bang ha kae, e ka ba ho ea botleng kapa bobeng. Ka baka leo, ke hobaneng ha re lokela ho lula re le hlokolosi ka seo re se buang le seo re se etsang boteng ba ba bang?

Phetoho ea Katamelo

Katamelo ea rona e atisa ama bokhoni ba rona ba ho susumetsa ba bang. Katamelo e bohale, e hlaolang, e se nang setsoalle e tla tebela batho, leha u khona ho pala, mantsoe a hau, ho sa natse na ke 'nete ha kae, ke ka thata a ka amoheloang. Ka ho fapana, katamelo e mofuthu le ho lumela ho ba bang e ba hulela ho rona. E bopa tlamahano ea setsoalle. Jesu o ile a beha tšiea ena hamonate ha a re, “ ‘Ha ke sa tla le bitsa bahlanka, kahobane mohlanka ha a tsebe se etsoang ke morena oa hae; ke le bitsitse metsoalle, kahobane ke le tsebisitse tsohle tsee ke li utloileng ho Ntate’ ”(Johanne 15:15). Metsoalle ea amohelana ho sa natse mefokole le liphoso hape ba arolelana thabo ea bona le mahlomola ka bolokolohi.

Bala Mattheu 15:21–28 le Mareka 14:6–9. Litemana tsena li hlalosa basali ba babeli ba maemo a fapaneng haholo. Jesu o utloahala a le bohale ho e mong empa a le bonolo ho e mong. Ke matšoao a fe ao u a bonang litemaneng tsee a supang hore Jesu o ne a nanabela e mong le e mong oa bona ka mohau ‘me a bopa ho tšepana?

Mosali ea ho Mattheu 15 ke mo-Kanana. Jesu o hana kopo ea hae ka boomo qalong e le hore, ha a pheella, tumelo ea hae e tle e hole. Qetellong o mo nea takatso ea hae e be o etsa polelo e makatsang eo ho seng moetapele oa borapeli Judea ea neng a ka e etsa ka nako eo ho mosali eo oa mofutsana oa mo-Kanana. O bua phatlalatsa o re, “‘Mosali, tumelo ea hao e kholo!’” (Matt. 15:28). O mo fa thoriso e kholo ka ho fetisisa eo moruti oa borapeli a neng a ka fana ka eona. Nahana kamoo pelo ea hae e ileng ea nyakalla kateng le ka moo bophelo ba hae bo ileng ba fetoha.

Mosali ea tlotsang maoto a Jesu ka setlolo ke mo-Juda—mosali ea botumo bo bobbe, mosali ea hlolehileng hangata ‘me a etsa libe hangata, empa ea neng a tšoareletsoe, a fetohile, a nchafetse. Ha ba bang ba bo bua hampe, Jesu oa mo rorisa ‘me o ananela liketso tsa hae. Oa bua, o re, “‘Hohle lefatšeng moo Evangeli ena e tla boleloa teng, se entsoeng ke eena le sona se tla boleloa, a tle a hopoloe ka sona’” (Mareka 14:9).

Re ipapisitse le lipale tse peli tseo re li balileng kaholimo, lintlha tsa bohlokoa bakeng sa katamelo e hapang ke li fe? U hloka ho lokisa eng katamelong ea hau, e seng feela bakeng sa ho paka, empa bakeng sa bophelo ka kakaretso?

Ho Bua ‘Nete ka Lerato

Setsoalle ha se le seng ha se ka ke sa hapela batho ho Kreste. Re ka ba le metsoalle e mengata, batho bao re natefeloang ke ho ba le bona bao le bona ba thabelang ho ba le rona, empa ha ho se mohla re ba bolellang seo Jesu a leng sona ho rona le kamoo a fetotseng maphelo a rona kateng, setsoalle sa rona se ka ba le phetoho e nyane bakeng sa bosafeleng. Kannete, ho ka etsahala re be batho bao batho ba ratang ho ba le bona, empa Molimo o batla re fetisa ho ba feela batho bao ba bang ba ratang ho ba le bona. Setosalle ha se le seng ha se na ho tlisa batho ho Kreste, feela katamelo e mpe e ka ba lelekella hole le Kreste.

Moapostola Pauluse o re hopotsa ho bua “‘nete ka lerato” (Baef. 4:15). Tlamahano tsa lerato li ba teng ha re lumellana le batho khafetsa kamoo ho ka khonehang, re bontša kamohelo, re ba rorisa moo ho hlokehang. Ho bohlokoa ha ka kang hore re etse tloaelo ea ho bona tse ntle bathong ho e-na le tse mpe.

Bala 2 Bathesalonika 1:1–4. Thathamisa tse ling tsa lintho tse khetholohileng tseo Pauluse a rorisang Ba-Thesalonika ka tsona.

Ho na le batho bao e kang ba thabela ho bona lintho tse phoso ka ba bang. Ba bonahala ba nyakalla ha ba fumana ntho e ‘ngoe eo motho e mong a sa e etsang hantle, ka baka la hore feela e etsa ba ikutloe ba le motlotlo ka bona haeba ho se lebaka le leng. Moapostola Pauluse o ne a fapane. O ne a batlana le se molemo likerekeng tseo a n’ a li sebeletsa. Bonnete teng, o ne a khalema liphoso ‘me o ne a sa lumelle sebe, empa thahasello ea hae e ne e le ho aha likereke tseo a li thehileng. Tsela e ‘ngoe ea ho etsa taba ena e ne e le ho totobatsa seo ba se entseng hantle. Polelo ea Ellen G. White e holim’a bohlokoa ba likamano tse mofuthu ea tsoteha. “Haeba re ikokobetsa kapele ho Molimo, ‘me re ba mosa le molemo le pelo-nolo le qenehelo, ho ne ho tla ba le tšokoloho tse fetang tse lekholo ho tla ‘neteng moo ha joale ho seng le e ‘ngoe.” — *Testimonies for the Church*, pok. 9, leq. 189.

A k’o thuisse polelo e kaholimo motsotsoana. Ho ne ho tla bolela eng kerekeng ea hau haeba mosa, molemo, pelo-nolo, le qenehelo (mohau) li ne li khaphatseha ho tsoa pelong ea setho ka seng? Kereke e tšoanang le ee e ne e tla shebahala joang? Talima ka pelong ea hau u ipotse ka tsela eo u neng u ka ntlafala boemong bona.

Mohloli oa Kamohelo

Bala Baroma 15:7 le Baefese 4:32. U ka hlalosa motheo oa kamohelo eohle joang? Taba-kholo ea katamelo e nang le kamohelo ke e fe?

Liqotsulong tse na tse peli moapostola Pauluse o bua ka litšiea tseo e leng kaletsa ea ho amohelana ha rona. Kahobane Kreste o tšoareitse le ho amohela e mong le e mong oa rona, na re ka tseba ho hana ho tšoarelana le ho amohelana? Hantle-ntlle, re amohelana hobane Kreste a re amohetse, ho sa natse likoli tsa e mong. Nahana ka thata ka se boleloang ke taba ena. Nahana ka uena le ka lintho tse ling tseo u li entseng tseo e ka bang u ntse u loana le tsona le joale — lintho tseo, mohlomong, li tsejoang ke uena feela, lintho tseo u ka hoamang ka maleng ha ba bang ba ka li tseba.

Feela? Ka tumelo, u amohelehile ho Kreste, ea tsebang ka lintho tsohle tseo e ka bang ba bang ha ba li tsebe ka uena. E, o li tseba kaofela, feela, o u amohela ho ntse ho le joalo, e seng ka lebaka la botle ba hau, empa ka lebaka la botle ba Hae. Ha ho le joalo, katamelo ea hau ho ba bang e lokela ho ba joang? Ena ke taba e thata ho ba bang hore ba e utloisise. Kamohelo ea 'nete ke hore re amohela ba batho ba le joalo, ka litloaelo tsa bona tsohle tsa sebe, hobane ke batho ba bopuoeng ka setšoantšo sa Molimo. Hobane Kreste o re shoetse "ha re sa le baetsalibe" 'me a re "boelanya le Molimo" re sa le lira tsa Hae, re ka tšoarela ba bang 'me ra ba amohela. Lerato leo a re ratang ka lona e ba lona motheo oa ho amohela le ho tšoarela ba bang (Baroma 5:6–10).

Empa hang ho ba kamano e amohelang e tsotellang e thehoe, hangata ho ea hlokahala ho toba motho e mong ka lerato ka 'nete ea Lengolo. Ho hloleha ho etsa sena ke ho lesa ho rata. Joalo ka metsoalle, re tsotella ho lekana hore re arolelane linnete tsa bosafeleng tse fetolang maphelo le metsoalle ea rona. Katamelo ea Jesu e ne e se, "Etsa sohle seo u se ratang. Ho lokile. Ke tla u amohela ho le joalo." Katamelo ea Hae e ne e le, "Ho sa natse seo u se entseng, ke ikemiselitse ho u tšoarela le ho u fa matla a ho fetoha." 'Nete ea Bibeletse ha e boleloa ka boikokobetso ka moea oa Kreste ka katamelo e tletse lerato e hapa lipelo 'me e fetole maphelo.

Ho khonahala joang ho amohela motho kantle ho ho amohela boitšoaro ba hae ba sebe? Ke joang re ka amohelang feela ka nako eona eo re sa lumelle kapa ho iphapanyetse sebe?

‘Nete e Boletsoeng ka Lerato

Jesu o ne a sa lese ho bolela ‘nete “ka lebaka la lerato,” hobane hoo e ne e tla be e se lerato. Lerato le batla tse molemo o fetisisang ho ba bang kamehla. Ha ho na khohlano mahareng a lerato le ‘nete. ‘Nete e boletsoeng ka boikokobetso le ka mosa ke polelo ea lerato. Jesu o itse, “Ke ‘na tsela, le ‘nete, le bophelo’ ” (Johanne 14:6). Jesu ke Eena feela tsela ea pholoho (Liketso 4:12). Mohau oa Hae o re pholosa hore re tle re tsebe ‘nete ea Hae ‘me re phele bophelo ba Hae. ‘Nete ha e se na lerato e lebisa qhafutsong ea bomolaong, bo bolaeang bophelo ba moea. Hona ho bitsoang “lerato” kantle ho ‘nete ho lebisa maikutlong a ho mamellana feela a se nang motheo, a siea motho a phaphametse leoatleng la ho hloka botsitso. ‘Nete e boletsoeng ka lerato e lebisa boiphihlelong ba Bokreste ba ‘nete bo fanang ka tsela e hlakileng, sepheo, le botsitso.

Bala 1 Petrose 3:15; 2 Timothea 4:2; le Tite 3:4, 5. Ke lipolelo li fe litemaneng tsee tse fanang ka tekano pakeng tsa ho bolela ‘nete ea Bible le moea o ikokobelitseng, o amohelang?

Lingoli tsa Testamente e Ncha li ne li sa phahamise taba ea lerato holim’a ‘nete. Ba ne ba tsoaka lerato le ‘nete, mohau le molao, lereko le botšepahi ka makhethe a maholo. Petrose o eletsa balumeli ‘moho le eena ho “ikarabela ka mosa le ka hlomphe ho ea le botsang tšepo e ho lona”(1 Pet. 3:15). Ka mantsoe a mang, u lokela ho tseba seo u se lumelang, le lebaka la ho lumela, ‘me u tsebe ho hlalosa seo u se lumelang le mabaka a teng. Sena ha se bolele hore u na le likarabo kaofela kapa u lokela u tsebe ho kholisa ba bang ka seo u se lumelang. Ho bolela feela hore ka “mosa le ka hlomphe”—ke hore, ka boikokobetso le ka kutloisiso ea boholo ba taba e paneng—u hlalose le ho buelella tumelo ea hau.

Pauluse o eletsa mohlankana ea ntseng a le tataisong ea hae, Timothea hore a “Bolele Lentsoe, u phehelle nako ha e tšoaneleha, le ha e sa tšoanelehe; u lae, u khalemele u khotatse ka mamello eohle le ka ho ruta” (2 Tim. 4:2). O hopotsa Tite hore ke mosa le lerato la Molimo tse pholositseng ba tsoetsoeng bocha ho Eena (Tite 3:5). Le rona, re biletsoa ho bolela ‘nete ka lerato le ka boikokobetso le ka hlomphe le bonolo. Morena oa rona o re memela ho ikopanya le Eena ho arolelana molaetsa oa Hae oa mehla ea bofelo ka lerato ka katamelo ea kamohelo ho lefatše le timelang ke ho ke ho hloka Krete.

Haeba motho e mong a ne a ka u botsa, “Hobaneng u le Mokreste?” U ne u tla arabela joang, hobaneng?

Ho Ithuta Haholoanyane:

“Ho Kreste ho na le bonolo ba molisa, lerato la motsoali, le mohau o se nang tekanyo oa Mopholosi ea lereko. Litlhhonolofatso sa Hae o li fana ka tsela e hohelang ka ho fetisisa. Ha a khotsofalle feela ho phatlalatsa litlhhonolofatso tsena; o li hlhisa ka tsela e khahlang ka ho fetisisa, hore li tsoale takatso ea ho ba le tsona. Kahona bahlanka ba Hae ba lokela ho hlhisa menono ea khanya ea Mpho ena e sa boleloeng. Lerato le makatsang la Kreste le tla nolofatsa le ho kokobetsa lipelo, moo ho bolela lithuto tsa Bibe le feela ho ke keng ha fihlela letho. ‘Tšelisang, tšelisang sechaba sa ka, ho bolela Molimo oa lona.’ ‘Nyolohela thabeng e phahamileng, uena ea bolellang Sione taba tse molemo; u phahamise lentsoe la hao ka matla, uena ea bolellang Jerusalema taba tse molemo; u le phahamise, u se ke oa tšaba, u bolelle metse ea Juda, o re: Molimo oa lona ke ona! . . . O tla alosa mohlape oa hae ka mokhoa oa molisa, o tla bokella likonyana matsohong a hae, a li jare sefubeng sa hae; le tse anyesang, a li sotetse butle.’ Esaia 40:1, 9–11.”—Ellen G. White, *The Desire of Ages*, maq. 826, 827.

Lipotso tsa Puisano:

1. Ke bomalimabe, empa batho ba bang ba ikutloisa monate ka ho supa liphosho tsa ba bang. Re ka etsa joang hore re se oele mohopolong o tšoanang?
2. Lemoha ketsahalo ena: Motsoalle o qeta ho khutla lefung e be o etsa polelo ena: “Ke thabile haholo hore e be ‘mangoane o leholimong ‘me o ntlimile a le teng. Ho ea nthabisa.” Re ipapisitse le litšiea tseo re ithutileng tsona thutong ea beke ena, u ka arabela joang? Ke hore, ho sa natse hore na boemo ba bafu bo bohlokoa ha kae, hobaneng ha nako eo e ka bang e sa nepahalang ea ho tšoarela motho eo boithuto ba Bibe le tabeng ee?
3. Buisanang ka polelo e latelang ka mabapi le bopaki ba rona ho ba bang: “Eona ketso eo ea ho shebana le bobè ho ba bang e kenya bobè ho ea shebang. Ka ho tsitsa liphosong tsa ba bang, re fetoleloa setšoantšong sa se tšoanang. Empa ka ho talima ho Jesu, re bua ka lerato la Hae le semelo sa Hae se phethehileng, re fetoleloa setšoantšong sa Hae. Ka ho nahana ka bophelo bo phahameng boo a bo beileng kapele ho rona, re tla phahamisetsoa sebakeng se hloekileng se halalelang, e leng boteng ba Molimo. Ha re lula mona, ho tsoa ho rona leseli le chabisetsang bohle ba hokahaneng le rona.”—Ellen G. White, *Gospel Workers*, leq. 479.